



## KPM terus perkasa bahasa Melayu

Oleh Latifah Arifin - Oktober 11, 2023 @ 11:30pm  
latifah@bh.com.my

KUALA LUMPUR: Kementerian Pendidikan (KPM) menjalankan pelbagai aktiviti bahasa dan kesusteraan di seluruh negara menerusi Sambutan Dekad Bahasa Kebangsaan dalam usaha memperkasa dan memartabatkan bahasa kebangsaan.

Melalui inisiatif tahunan itu, semua warga kerja bahagian dan agensi di bawah KPM dilibatkan, sekali gus menterjemahkan komitmen kementerian itu yang terus proaktif dalam memupuk semangat cintakan bahasa, malah menekankan kepentingan membudayakan penggunaan bahasa yang betul.

Kemuncak Sambutan Dekad Bahasa Kebangsaan ditutup dengan Majlis Sambutan Dekad Bahasa Kebangsaan Sektor Pendidikan Tahun 2023 yang diadakan di Institut Pendidikan Guru Kampus Bahasa Melayu, di sini semalam.

Program berkenaan yang juga sebahagian usaha menjenamakan semula Bulan Bahasa Kebangsaan (BBK) itu membabitkan seluruh warga KPM khususnya sektor pendidikan termasuk Majlis Amanah Rakyat (MARA), Jabatan Perpaduan dan Integrasi Nasional (JPNIN) serta Institut Terjemahan dan Buku Malaysia (ITBM).

Menteri Pendidikan, Fadhlina Sidek dalam ucapannya pada majlis itu menekankan kepentingan memelihara kedudukan tinggi bahasa Melayu sebagai bahasa kebangsaan.

"KPM komited untuk terus menjunjung, mendaulatkan serta mengukuhkan penggunaan bahasa kebangsaan dalam setiap aspek pentadbiran dan pengurusan.

"Adalah amat penting untuk setiap warganegara menanamkan rasa kecintaan terhadap bahasa kebangsaan," katanya.

Pada majlis itu, Fadhlina turut menyampaikan Anugerah Tokoh Bahasa Melayu Sektor Pendidikan Kategori Teknik Vokasional kepada Ketua Jabatan Teknologi Awam, Kolej Vokasional Slim River, Perak, Dr Siva Rabindarang.